

BOSNA I HERCEGOVINA
FEDERACIJA BOSNE I HERCEGOVINE
VRHOVNI SUD
FEDERACIJE BOSNE I HERCEGOVINE
Broj: 70 1 K 000047 25 Kr
Sarajevo, 09.12.2025. godine

Vrhovni sud Federacije Bosne i Hercegovine u Sarajevu, u vijeću sastavljenom od sudija Dragana Čorlije kao predsjednika vijeća, Emira Neradina i Sanele Rondić kao članova vijeća, uz učešće zapisničara Mirze Omerovića, odlučujući o zahtjevu Posebnog odjela Vrhovnog suda Federacije Bosne i Hercegovine za korupciju, organizirani i međukantonalni kriminal za rješavanje sukoba nadležnosti sa Kantonalnim sudom u Novom Travniku u vezi postupanja po zahtjevu Kantonalnog tužiteljstva Srednjobosanskog kantona iz Travnika broj T06 0 KTAO 0036640 25 od 10.10.2025. godine za određivanje posebnih istražnih radnji, u sjednici vijeća održanoj dana 09.12.2025. godine, donio je sljedeće:

RJEŠENJE

Za postupanje po prijedlogu Kantonalnog tužiteljstva Srednjobosanskog kantona za određivanje posebnih istražnih radnji broj T06 0 KTAO 0036640 25 od 10.10.2025. godine nadležan je Kantonalni sud u Novom Travniku.

Obrazloženje

Posebni odjel Vrhovnog suda Federacije Bosne i Hercegovine za korupciju, organizirani i međukantonalni kriminal (Posebni odjel suda) je zahtjevom broj 70 1 K 000047 25 Kpp od 28.11.2025. godine pokrenuo postupak za rješavanje sukoba nadležnosti za postupanje po zahtjevu Kantonalnog tužiteljstva Srednjobosanskog kantona za određivanje posebnih istražnih radnji broj T06 0 KTAO 0036640 25 od 10.10.2025. godine, između tog suda i Kantonalnog suda u Novom Travniku.

U zahtjevu se navodi da je Posebnom odjelu suda dostavljen spis Kantonalnog suda u Novom Travniku u kojem se taj sud rješenjem broj 06 0 K 020378 25 Kpp od 13.10.2025. godine oglasio stvarno nenadležnim za postupanje po prijedlogu Kantonalnog tužiteljstva Srednjobosanskog kantona za određivanje posebnih istražnih radnji broj T06 0 KTAO 0036640 25 od 10.10.2025. godine, zbog toga što krivično djelo Neovlaštena proizvodnja i stavljanje u promet opojnih droga iz člana 238. stav 2. Krivičnog zakona Federacije Bosne i Hercegovine (KZ FBiH) predstavlja poseban oblik krivičnog djela Udruživanje radi činjenja krivičnih djela iz člana 340. stav 1. i 2. KZ FBiH i po svom sadržaju radnje

počinjena tog krivičnog djela predstavljaju pripremne radnje koje su inkriminisane kao samostalno krivično djelo te spadaju u stvarnu i mjesnu nadležnost Posebnog odjela suda.

Suprotno prethodno navedenom, Posebni odjel suda je stava da se Kantonalni sud u Novom Travniku neosnovano oglasio nenadležnim. Obrazlažući takav svoj stav, sudija Posebnog odjela suda se poziva na dokaze dostavljene uz prijedlog za određivanje posebnih istražnih radnji (da iz službenih zabilješki proizlazi da se na imanju jednog od osumnjičenih proizvodi veća količina opojne droge, a iz dostavljene informacije FUP-a proizlazi da su osumnjičene osobe „organizovale posebnu grupu sa ciljem vršenja krivičnih djela i sticanja protivpravne imovinske koristi, pri čemu svaka od osoba učestvuje u izvršenju krivičnog djela Neovlaštena proizvodnja i stavljanje u promet opojnih droga iz člana 238. stav 1. KZ FBiH), te zaključuje da iz tih dokaza „ne proizlazi koje je to konkretne radnje preduzeo osumnjičeni (kojem se stavlja na teret navedeno krivično djelo)“, radi učinjenja pomenutog krivičnog djela, „na koji način iz dostavljenih dokaza ne proizlaze obilježja krivičnog djela Udruživanje radi činjenja krivičnih djela iz člana 340. stav 1. KZ FBiH, a samim tim i krivično djelo iz stava 2. navedenog člana i Zakona“. Prijedlog Posebnog odjela je da ovaj sud odredi Kantonalni sud u Novom Travniku kao stvarno i mjesno nadležan za postupanje u konkretnom slučaju.

Federalni tužitelj je podneskom broj T11 0 KTA 0010602 25 od 04.12.2025. godine predložio da se Kantonalni sud u Novom Travniku odredi kao stvarno nadležan sud za postupanje po prijedlogu Kantonalnog tužiteljstva Srednjobosanskog kantona za određivanje posebnih istražnih radnji broj T06 0 KTAO 0036640 25 od 10.10.2025. godine.

Ovaj sud je razmotrio zahtjev za rješavanje sukoba nadležnosti Općinskog suda u Zenici, pa je odlučio kao u izreci iz razloga koji slijede:

Stvarna nadležnost Posebnog odjela suda propisana je članom 25. Zakona o suzbijanju korupcije i organiziranog kriminala u Federaciji Bosne i Hercegovine (ZOSKOK), koji u stavu 1. tačka a) predviđa da je Posebni odjel suda, između ostalog, stvarno i mjesno nadležan za krivična djela Udruživanje radi činjenja krivičnih djela iz člana 340. KZ FBiH, Organizirani kriminal iz člana 342. KZ FBiH, uključujući time sva krivična djela koja je učinila grupa za organizirani kriminal. Iz navedene zakonske odredbe proizlazi da su krivična djela organiziranog kriminala za koja je nadležan Posebni odjel suda taksativno navedena, a takav pristup, tj. taksativno navođenje pojedinih krivičnih djela ili određeno navođenje svih ili pojedinih krivičnih djela iz određene Glave KZ FBiH, odredba člana 25. ZOSKOK slijedi i u svom preostalom dijelu (član 25. stav 1. tačke b) do e) ZOSKOK). Stoga, iako je tačno da krivično djelo Neovlaštena proizvodnja i stavljanje u promet opojnih droga iz člana 238. stav 2. KZ FBiH predstavlja poseban oblik krivičnog djela Udruživanje radi činjenja krivičnih djela iz člana 340. KZ FBiH, to krivično djelo, tj. krivično djelo Neovlaštena proizvodnja i stavljanje u promet opojnih droga iz člana 238. stav 2. KZ FBiH, predstavlja posebno krivično djelo (različito od krivičnog djela Udruživanje radi činjenja krivičnih djela iz člana 340. KZ FBiH), koje nije ni navedeno u odredbi člana 25. ZOSKOK kao krivično djelo za koje je nadležan Posebni odjel suda (za

razliku od krivičnog djela Udruživanje radi činjenja krivičnih djela iz člana 340. KZ FBiH). Iz navedenog slijedi da Posebni odjel suda nije stvarno nadležan za krivično djelo Neovlaštena proizvodnja i stavljanje u promet opojnih droga iz člana 238. stav 2. KZ FBiH, nego je u smislu člana 28. Zakona o sudovima u Federaciji Bosne i Hercegovine, za to krivično djelo stvarno nadležan kantonalni sud, a u konkretnom slučaju je to Kantonalni sudu Novom Travniku.

Imajući u vidu prethodno navedeno, proizlazi da je u konkretnom slučaju, za postupanje po prijedlogu Kantonalnog tužiteljstva Srednjobosanskog kantona za određivanje posebnih istražnih radnji broj T06 0 KTAO 0036640 25 od 10.10.2025. godine nadležan Kantonalni sud u Novom Travniku.

Iz navedenih razloga, a na osnovu člana 38. stav 1. ZKP FBiH, odlučeno je kao u izreci ovog rješenja.

Zapisničar
Mirza Omerović, s.r.

Predsjednik vijeća
Dragan Čorlija, s.r.